

## ASSOMPTION 2020 - TAONA A



Ry Kristianina havana, tamin'ny Alahady teo faha-19 taona mandavantaona namaritra tsara isika fa ady sady dia ny fiainana fa indrindra isika miatrika an'ity KORONTANAVIRUS ITY nefo afaka namakivaky ny onjam-piaínana isika satria i Jesoa Kristy no mitantana antsika tahaka nitantanany an'i Piera izay namakivaky ny onjan-dranomasina rehefa niantso an'i Piera hanatona azy i Jesoa Miantso antsika sy maniraka antsika koa i Kristy amin'izao vanim-potoana iainantsika izao satria isika no Kristy mpiara-belona, taranaka manorina ny fiainana araky ny sitrak'Andriamanitra fa tsy taranaka mandrava ary ho tody soa amantsara isika amin'ny fikarakarantsika ny tranobe iombonana

ka afaka hivelona sy hivelatra anatin'ity tranobe ity ka hahita ny tena fampandrosoana marina dia ny fampandrosoana ny maha-olona sy ny olona manontolo na dia aza ny korontana maro isankarazany. Matoky isika fa noho ny asan'ny Fanahy Masina dia zary EOV MISIONERA TABERNAKLA

Vakiteny I : Apokalipsa 11,19a.12,1-6a.10ab.  
Tononkira : Sal. 45,  
Vakiteny II : 1 Kor, 15,20-26  
Evanjely : Lk 1,39-56

VELONA eo anivon'ny olona sahirantsina mafy.

Androany faha-15 aogositra, ankalazantsika manokana ny Assumption izany hoe ny Nampakarina an'i Masina Maria vatana sy fanahy any an-danitra. Betsaka amintsika ny manontany hoe inona moa no tena dikan'izany ?

Io no ataontsika hoe "dogme" izany hoe votoatim-pinoana ho antsika katolika izany ary izao no tena azo lazaina hamaritantsika azy dia tsy hoe nitsangana velona tahaka an'i Jesoa i Masina Maria, maty

izy fa noho ny asa fahasoavan'Andriamanitra tao amin'i Jesoa nandresy ny fahafetasana dia efa tanteraka ao amin'i Masina Maria izay famonjena rehetra nataon'i Jesoa, tanteraka tamin'izy nandresy ny fahafatesana niakatra any an-danitra ka ireo famonjena nentin'i Jesoa ireo dia nosantarin'i Masina Maria noho ny fitsimbinan'Andriamanitra.

Tsy hoe noho ny fahamendrehany fa noho izy renin'i Jesoa renin'Andriamanitra dia ilay famonjena nentin'i Jesoa ho antsika olombelona dia tanteraka tao amin'i Masina Maria. Io no miandry antsika rehefa tanteraka ny zava-drehetra dia isika ampakarina vatana sy fanahy any an-danitra ary miombona ao amin'ny fahamendren'Andriamanitra iombonan'ny olomasina rehetra.

Izay rehetra hiseho amintsika noho ny famonjen'i Kristy dia i Masina Maria no nisantatra azy; nandray ny Fanahy masina isika tamin'ny batemy, i Masina Maria no nandray ny Fanahy Masina voalohany tamin'izy nandray ny hafatry ny anjely gabriely. Toy izany koa ny jaly mafy tsy maintsy natrehiny araky ny faminanian'i Simeona dia voalefona koa ny fon'i Masina Maria. Hahazo ny satroboninahitra any an-danitra isika raha mifikitra amin'i Jesoa ka hitsangan-ko velona vatana sy fanahy ary ampakarina any an-danitra tahaka an'i Masina Maria izay ankalazaintsika androany.

Azo ampifandraisina amin'ny hafatra nataantsika tamin'ny Alahady lasa teo fa ady sy dia ny fiainana. Amin'ny vakiteny voalohany dia tantarain'i Joany ny faminaniana netrehan'i Masina Maria niady raha milaza ny momba an'ilay vehivavy voantantara ao izy, ary ny vahoakan'Andriamanitra rehetra koa nandresy tamin'ny ady natrehiny tamin'ny dragona dia ny demony. Isika koa raha mifikitra amin'i Jesoa dia mandresy. Mba ho taranaka manorina isika, taranaka mampijoro fa sanatria ho taranaka mpandrava na mpanakorontana. Izany no tanteraka tao amin'i Masina Maria ka fanantenana ho antsika ilay ady natrehiny.

Ambaran'i Md Paoly amin'ny vakiteny faharoa fa i Kristy no santatra, tanteraka ao Aminy ny famonjena, tanteraka tao amin'i Masina Maria izay. no manambara amintsika fa ilay fandresen'i Kristy dia ho antsika ihany koa. Izany no votoatim-pinoana ambara antsika amin'izao fankalazana an'i Masina Maria nampakarina vatana sy fanahy any an-danitra izao.

Ny Evanjely kosa milaza amintsika fa i Masina Maria no manandratra ilay tononkira manambara fa nahavita zava-dehibe taminy tokoa ilay mahefa izany hoe Andriamanitra.

Tspan'i Masina Maria ny halehiben'ny fahasoavan'Andriamanitra raha izy nandeha namangy an'i Elizabeta rahavaviny ary niara-nientana izy mirahavavy nanambara ny asan'Andriamanitra mampitolagaga izay tsy azo saintsainina ka tanteraka tokoa ny famonjena ary efa misantatra azy i Masina Maria ka isika ihany koa dia hisantatra an'izany amin'ny alalan'izao vavaka sy Eokarisitia ankalazaintsika izao.

Averimberintsika matetika ary tena zava-dehibe tokoa fa isika no mitondra an'i Jesoa eo amin'ny mpiara-belona tahaka an'i Masina Maria nitondra an'i Jesoa teo amin'i Elizabeta. Anjarantsika àry no mitondra an'i Jesoa amin'izao andro iainantsika izao ka hahafahantsika rehetra misantatra ny famonjena manambara tahaka ny nataon'i Elizabeta sy Masina Maria ny halehiben'ny fahasoavan'Andriamanitra. Noentanim-pinoana i Elizabeta ka nilaza tamin'i Masina Maria hoe : "Sambatra ilay nino ka ho tanteraka izay nampilazain'ny Tompo taminy". Nino i Masina Maria ary

niombom-boninahitra tamin'ny zanany izy, nampakarina any an-danitra. Tsapan'i Elizabeta izany fahasoavan-dehibe izany ka nahatonga azy niaraka tamin'i Masina Maria nankalaza an'Andriamanitra.

Enga anie isika koa entanin'izany finoana izany satria isika izao no Kristy mpiara-belona amin'olona indrindra isika tanora izay taranaka mpanorina mba hanorina ny fiainam-baovao tahaka nataon'i Elizabeta sy Masina Maria isika eo anivon'ny mpiara-belona, mba hiaraka hankalaza ny voninahitr'Andriamanitra isika ary ho sambatra hahita ny fitiavan'Andriamanitra eo anivontsika

Enga anie i Masina Maria hivavaka ho antsika indrindra ho antsika tanora mba ho taranaka mpanorina isika ka hiadam-pinaritra ity tanintsika ity.

Ry Jesoa zokinay ô, nandalo tety an-tany i Maria reninao ary izy no mpiaro voalohany an'ity Madagasikara ity, fantatrao ny zavatra iainanay miatrika an'ity KORONTANANAVIRUS ITY, nahalala ny zavatra mitranga amin'ny fiainanay tokoa i Masina Maria Reny na amin'ny fahorianana amin'ny hafaliana na amin'ny tebiteby sy ahiahy na amin'ny hakiviana, koa ampio ary izahay ry Jesoa Kristy zokinay ô mba hanahaka ny reninao hahay hitondra anao eo amin'ny mpiara-belona ho TABERNAKLA VELONA TAHAKA AZY ANIE IZAHAY Enga anie izahay ho tahaka an'ilay reninao nitondra anao tany amin'i Elizabeta ka niaraka nankalaza an'Andriamanitra tokoa izy mirahavavy, enga anie izahay hahay hankalaza anao amin'ny fiainanay manontolo mba ho sambatra miaraka aminao any an-danitra, Amen

Mompera Arseveka Mgr Benjamin Ramaroson